

Mid-Day Dogri News Bulletin, 04th April 2025

समे — 12:25

<><><><><><>

PM Bimstec

प्रधानमंत्री नरेन्द्र मोदी होरें बैंकॉक, थाईलैंड च अज्ज 6में बिमस्टेक शिखर सम्मेलन च हिस्सा लैता जित्थे थाईलैंड दिएं प्रधानमंत्री पैंटोंगटार्न शिनावात्रा होरें बक्ख-बक्ख खेत्तरें च आपसी सैहयोग बधाने दी वचनबद्धता गी पही पक्का कीता। प्रधानमंत्री मोदी होरें आखेआ ऐ जे बिमस्टेक, दक्खन एशिया ते पूर्व एशिया गी जोडने आह्ला इक पुल ऐ। एह्दे शा पैहले प्रधानमंत्री मोदी होरें म्यांमा दे वरिष्ठ जनरल मिन आंग हलेंग हुंदे'नै बिमस्टेक शिखर सम्मेलन थमां बक्ख-बाह्रें मलाटी कीती। सोशल मीडिया दी इक पोस्ट च श्री मोदी होरें म्यांमा च हाल च आए दे भूंचाल करी होए दे जान-माल दे नुकसान पर बसोस जताया। उ'नें आखेआ जे बिपदा दी इस घड़ी च भारत म्यांमा दे अपने भ्राह्मे-भैह्नें दी मदाद लेई हर मुमकन मदाद उपलब्ध करोआग।

<><><><><><>

JK Govt Orders

बजट 2025-26 च कीते गेदे वायदें गी पूरा करदे होई लोक हित आले इक बड्डे फैसले तैहत जम्मू कश्मीर दी सरकारै अंत्योदय अन्न योजना हेठ औह्ते आले गरीब परोआरें दिएं कुड़िएं आस्तै राज्य ब्याह सहायता योजना दे तैहत माली मदाद गी 50 जहार रपे कोला बधाइयै 75 जहार रपे करी दित्ता ऐ। माली मदाद आहली इस रकम गी कुड़िएं दे ब्याह शा पैहले उ'दे बैंक खाते च सिद्दे जमा करी दित्ता जाह्ग। एह्दे अलावा जम्मू-कश्मीर सरकारै राश्ट्री समाजी सहायता योजना ते संगठित समाजी सुरक्षा योजना दे तैहत थोने आहली पेंशन गी बी बधाई दित्ता ऐ, जेह्दे कन्नै बर्जुगें, विधवाएं, विशेष रूप कन्नै दिव्यांग ते ट्रांसजेंडर नागरिकें आस्तै मती माह्वार मदाद जकीनी बनी ऐ। सरकारी आदेश दे मताबक 60 ब'रें शा घट्ट उम्री दे लाभार्थिएं गी हर म्हीने 12 सौ 50 रपे, 60 शा 79 ब'रें दी उमरी दे लाभार्थिएं गी 15 सौ रपे ते 80 ब'रें शा मती उमरी दे लाभार्थिएं गी 2 जहार रपे हर म्हीने दित्ते जाडन।

<><><><><><>

Tribal Affairs Minister

जनजातीय मामलें सरबंधी मंत्रालय नै विस्तार कीते गेदे धरती आभा मिशन दी जम्मू-कश्मीर च अमल-आवरी लेई प्रदेश दे प्रशासन ते होरनें सरबंधत घड़ें कन्नै अपने सैहयोग दी रुपरेखा तैयार कीती ऐ। इस कार्यक्रम दा मकसद जम्मू-कश्मीर दे 112एं ब्लॉकें दे 393 ग्रामें सने 63 जहार 843 ग्रामें च बुनियादी ढांचे दी कमी गी दूर करना ऐ। एह्दा मुख् मकसद सेहत, शिक्षा, आंगनवाड़ी सुविधाएं ते रोजी-रूट्टी कमाने दे मौकें गी बेहतर बनाना ऐ। मंत्रालय नै जम्मू-कश्मीर च मिशन दे तैहत 8 करोड़ 77 लक्ख रपे मंजूर कीते न ते मुकामी प्रशासनें गी लाभार्थिएं दी मदाद लेई जागरूकता शिविर आयोजित करने लेई प्रोत्साहित बी कीता ऐ।

<><><><><><>

FCS&CA Union Secy

खुराक ते सार्वजनिक बंडूड आहले मैहकमे दे केन्द्री सचिव संजीव चोपड़ा होरें कल जम्मू दा दौरा लाया। उं'दे इस दौरे दा मकसद जम्मू-कश्मीर दे खुराक, सिविल सप्लाई ते उपभोक्ता मामलें आहले मैहकमे ते एफ.सी.आई. दे कम्मकाज दा जायजा लैना ते योजनाएं ते सुधारें दी अमल-आवरी दा आंकलन करना हा। इस मौके पर मुतल्लका ऐहलकारें कन्नै गल्ल करदे होई केन्द्री सचिव होरें सार्वजनिक बंडूड आहली प्रणाली गी साफ-सुथरा ते असरदार बनाने लेई मैहकमे दे जतनें दी सराहना कीती। उं'नें मैहकमे गी आखेआ जे ओह अगगे बी इस्सै चाल्ली दे जतनें गी बरोबर जारी रक्खन।

<><><><><><>

Manoj Kumar Passed away

मन्ने परमन्ने दे फिल्म अभिनेता मनोज कुमार हुंदा अज्ज बड्डलै मुंबई च काल होई गेआ। ओह 87एं ब'रें दे हे। देश भक्ति आहलियां फिल्मां बनाने करी ओह 'भारत कुमार' दे नांS कन्नै बी मशहूर हे। केई दहाकें तगर भारती सिनेमा च उं'दे बेजोड़ जोगदान लेई उनें'गी बड़ी मती प्रतिश्ठा आहले सम्मान पदमश्री ते दादा साहब फालके पुरस्कार कन्नै बी सम्मानित कीता गेआ हा। मनोज कुमार होरें उपकार, पूरब-पश्चिम ते क्रांति सने होर बी केई सारी शानदार फिल्में च अदाकारी कीती। राश्ट्रपति द्रौपदी मुर्मु ते प्रधानमंत्री नरेन्द्र मोदी होरें मनोज कुमार हुंदा काल पर दुक्ख ते बसोस जताया ऐ।

<><><><><><>

Volley Ball Udh

जम्मू-कश्मीर पुलसा दे शहीद सब-इंस्पेक्टर दीपक शर्मा होरें'गी इक श्रद्धांजलि दे तौर उप्पर सिविक एक्शन कार्यक्रम दे तैहत उधमपुर पुलस आसेआ कल जिला पुलस लाईन्स च वॉलीबॉल टूर्नामेंट दा आयोजन कीता गेआ। खरी मती गिनतरी च लोकें इस कार्यक्रम हिस्सा लैता। उधमपुर जिले दे बक्ख-बक्ख हिस्सें थमां कुल 8 टीमां हिस्सा लै'रदिआं न। डीएसपी हैडक्वार्टर्स प्रहलाद शर्मा होर कार्यक्रम दे मुख्ख परौहने हे ते अपने भाषणै च उं'नें युवाएं दे विकास लेई खेड्डें दे महत्व पर लोऽ पाई। उं'नें नौजवानें गी अपील कीती जे ओह खेड्डें च मती कोला मती शमूलियत जकीनी बनान।

<><><><><><>

Weather

मौसम विभाग नै केन्द्र शासित प्रदेश जम्मू-कश्मीर च अगले हफ्ते बरखा बरने दी पेशगोई कीती ऐ। अज्जै थमां 8 अप्रैल तोहड़ी मौसम खुश्क रौहग पर विभाग दा आखना ऐ जे 8 अप्रैल गी दपैट्टी मगरा गासै पर बदल घनोने ते उत्तरी कश्मीर ते सोनामर्ग दिएं उच्चिएं धारें पर हल्की बर्फबारी दी मेद ऐ। एहदे परैन्त औंदी 9 ते 10 अप्रैल गी कश्मीर संभाग दिएं मती सारी थाहें सने जम्मू खित्ते दिएं टामीं-टामीं थाहें पर हौली बरखा ते उच्चिएं धारें पर बर्फबारी होई सकदी ऐ। एहदे मगरा 11 अप्रैल गी बी मौसम बदलोखड़ा रौहग ते मैदानी इलाकें च हौली बरखा बरने ते उच्चे पहाड़ी इलाकें च हल्की बर्फबारी दा इमकान ऐ।

<><><><><><>